

Te Pakanga Tuatahi me te Rewharewha

Nā tō mātou matua mātou i tiki mai i hari. Te kōrero whēnei, e haere mai ana ahau ki te tiki mai i a koutou, kua tata ngā whiu o te ao, e tata ana ka mutu te pakanga o te ao, ko te wā tērā i pakanga ai te tiamana rāua ko te Pākehā, koirā te wā ka tikina mai ka mahue i a mātou a Mōrehurehu, te taenga atu ki reira koirā ngā kōrero

Ā heoi anō he noho, he noho heoi anō he whakarongo ki te ao, kei ā whea ka mutu te pakanga? Ko tana kōrero tērā, ki te mutu te pakanga ka puta ngā whiu o te ao ka rongu koutou i te auē o te tangata. Kāre mātou, a me kī kāore pea i pau, i huri pea te marama i tō mātou taenga ki reira ka mutu te pakanga, kātahi ka puta te mate i konā he whurū, kaaatahi ka matemate te tangata, maaatemate katoa te tangata, e whia tangata ki roto i te whare, na kāre mātou i mate, engari i whakawhiua mātou, i whakapā anō tia hoki ki taua mate raka, kāre mātou i mate, na koirā mātou i mahuengia ai tēnā kāinga e mātou a Mōrehurehu, ka noho atu i raro iho i te hāhi nei, koirā ngā āhuetanga,

Āe, kāore au i te mōhio e whia taku pakeke, kāore hoki au i tukuna ki te kura, heoi anō a kua āhua tamāhine ake nei pea taku kaumātua i te wā i te whuru, i te wā i mutu ai te pakanga tuatahi, ā ka noho mātou i reira, a ka mutu rā hoki te patu a te ā, nga whiu i ngā iwi ka noho kātahi ka karangangia he hui, hei tangi mō ngā mate, i mate i te whuru, ka tū ki Te Kōura te hui, nā ka haere mai mātou, ā ko taku pāpā me taku whaea whāngai nāna au, kia kino e hanga āhua māuiui tonu ana ia i te whuru, heoi anō ka tangihia ngā mate i konā, ka mutu, ka hoki atu ki tō mātou kāinga, ka mahuengia tērā kāinga kātahi mātou ka heke ki tērā takiwā ki Waimiha, mahuengia, kua puta hoki ngā whiu o te ao, kua kore e matemate te tangata.

He iwi nui mātou i noho ki Waimiha, Ngāti Rereahu, katoa, ko ngā iwi maha, Ngāti Pahere, ko tērā kāinga ko Waimiha nō Ngāti Te Ihingārangi, engari e rite ana ana hoki he teina he tuakana rātou nei, ko ō mātou matua ko ērā iwi, a ka noho mātou i reira, ā ka whakamoea au ki te tāne i reira, i te haerenga o taku hoa tāne, ka mamae te ngākau o taku whaea, ka haere mai kātahi ka kī mai ki au, i haere mai au ki a koe

e hine, kei a koe te āe kei a koe te kāo, koia nei ngā kōrero a taku whaea ki a au, e hiahia ana au ki a koe kia whakahokia koe e au ki tōku iwi, na ki konei, e rua ō utu i taku kōrero, āe, kāo, engari taku kōrero ki a koe, ki te kore, a taku whakaaro i a koe, kāore au e ora, a kua kino tēnā mea ki roto i au nē, ka whakaaro au ki te haere ki taku tāne, ka hoki mai anō, engari ka mate taku whaea, he aha hoki te painga ki au, e kōrero pono ana au i aku kōrero, ka roa ka kī mai utua taku pātai e hine, kāre au e utu kua whakaaro au me pēhea hoki he utu māku, kei roto i au e whakaaro ana, ka noho au ka mate taku whaea, ka haere au kāre e mate taku whaea, e kore hoki pea e mate taku tāne, ā ka karanga mai anō taku whaea, utua taku pātai e hine, āe rānei, kāo rānei, ka utua e au āe āe ka haere koe āe a heoi anō kua kore koe e mōhio e pēhea ana taku āhua i tērā wā, ka tangi taku whaea, kātahi ka pao mai i tana pao[pao]

Ko te pao tēnā o taku whaea ,ka kī mai kei te ata nei tāua ka haere